



Na osnovu člana 13. stav (1) tačke a), e), t) i z) i člana 15. tačka a) Zakona o odbrani Bosne i Hercegovine ("Službeni glasnik BiH", broj: 88/05), te člana 61. Zakona o upravi ("Službeni glasnik BiH", broj 32/02), donosim

SMJERNICE

za profesionalan odnos pripadnika Ministarstva odbrane Bosne i Hercegovine i Oružanih snaga Bosne i Hercegovine u obavljanju poslova i zadataka

I UVODNE NAPOMENE

Izvršenjem zakonskih zadataka i dodijeljenih misija, Ministarstvo odbrane i Oružane snage Bosne i Hercegovine su u proteklom periodu ostvarili značajne rezultate i postigli napredak u brojnim oblastima iz nadležnosti.

Praćeni raznim teškoćama, ostvareni rezultati i napredak postignuti su uz podršku svih institucija u odbrambenom sistemu Bosne i Hercegovine, institucija vlasti u Bosni i Hercegovini te uz pomoć NATO Štaba u Sarajevu, GK EUFOR-a, UNDP-a, Misije OSCE-a u Bosni i Hercegovini, Kompanije MPRI, drugih međunarodnih organizacija i partnerskih zemalja.

Analizom realizacije aktivnosti iz 2008. godine, uočeni su brojni nedostaci i propusti koji su narušili pozitivne efekte napornog rada na izgradnji ugleda Ministarstva odbrane i Oružanih snaga Bosne i Hercegovine.

II DETERMINANTE ZA PROFESIONALNI ODNOS

1. Usmjereni događajima i izazovima koje donosi sistem kolektivne sigurnosti, u narednom periodu očekuje nas realizacija započetih i pokretanje novih kompleksnih zadataka:
 - samostalna izrada i implementacija pregleda odbrane,
 - aktivnosti obuke, opremanja, modernizacije i jačanja sposobnosti za izvršavanje zakonskih zadataka i dodijeljenih misija,
 - intenziviranje aktivnosti na pridruživanju Bosne i Hercegovine evropskim i evroatlantskim integracijskim procesima i organizacijama, primarno u NATO i EU,
 - učešće u operacijama podrške miru i drugim aktivnostima u inostranstvu,
 - pružanje pomoći civilnim organima,
 - unapređenje ciljeva vanjske politike i ispunjavanje međunarodnih obaveza Bosne i Hercegovine u oblasti odbrane,
 - participacija u regionalnim i globalnim sigurnosnim i odbrambenim organizacijama, strukturama i inicijativama,
 - inteziviranje postojeće i proširivanje međunarodne odbrambene saradnje.

2. Izvršenjem zakonskih zadataka i dodijeljenih misija na osnovama profesionalizma dat ćemo puni doprinos jačanju odbrambenog sistema Bosne i Hercegovine, doprinijeti ispunjavanju državnih ciljeva u oblasti odbrane, eliminisati negativne pojave i stanja, te doprinijeti jačanju ugleda Ministarstva odbrane i Oružanih snaga Bosne i Hercegovine.
3. Na osnovu navedenog, 2009. godinu proglašavam godinom profesionalizma za sve pripadnike Ministarstva odbrane i Oružanih snaga Bosne i Hercegovine.
4. Ovo podrazumijeva da realizaciju svih zadataka treba bazirati na sljedećim načelima:
 - zakonitost (utemeljenost na zakonima i podzakonskim aktima),
 - efikasnost (pravovremenost, brzina i tačnost),
 - ekfektivnost (pozitivan konačni rezultat),
 - priuštivost (usaglašenost sa državnim mogućnostima i odbrambenim potrebama),
 - ekonomičnost (postizanje najmanjih troškova),
 - primjenjivost (realnost i mogućnost implementacije),
 - racionalnost (optimalna upotreba raspoloživih resursa),
 - transparentnost (dostupnost relevantnih podataka vlastima i javnosti),
5. Profesionalan pristup dodijeljenim poslovima i zadacima od svih pripadnika Ministarstva odbrane i Oružanih snaga Bosne i Hercegovine zahtijeva:
 - poznavanje i dosljednu primjenu zakonskih rješenja,
 - poznavanje i primjenu važećih planskih, doktrinarnih i drugih dokumenata,
 - odgovoran odnos i istrajnost u radu,
 - disciplinirano ponašanje i poštivanje subordinacije,
 - stručnost, samostalnost i samoinicijativnost,
 - organizatorske sposobnosti,
 - stalnu koordinaciju, timski rad i razmjenu informacija.
6. Profesionalizam uključuje i važnu moralnu dimenziju koja se ogleda u:
 - hrabrosti i istrajnosti u pozitivnim nastojanjima unaprijeđenja postojećeg stanja,
 - ličnim moralnim kvalitetima i čašću svakog pojedinca,
 - davanju doprinosa u uspostavi i jačanju pozitivnog profesionalnog ambijenta u svim organizacijskim cjelinama,
 - pozitivnom stavu o prevazilaženju teškoća,
 - davanju ličnog doprinosa i prepoznavanju lične odgovornosti,
 - opredjeljenju za pomoć drugima,
 - nadvladavanju ličnih interesa i usmjerenosti na opće dobro,
 - primjerenom ponašanju i izgledu.
7. U ostvarivanju strateškog državnog cilja - pridruživanje NATO-u, od svih struktura Ministarstva odbrane i Oružanih snaga Bosne i Hercegovine zahtijevam da iz djelokruga rada ostvare neposrednu konstruktivnu saradnju sa nadležnim strukturama Bosne i Hercegovine, NATO, EU i drugih strateških partnera sa konkretnim sadržajima.

8. Naš konačni cilj je izgradnja profesionalnih vojnih snaga, organiziranih, opremljenih i obučениh prema NATO normama, sa veličinom i strukturom koja je u skladu sa odbrambenim potrebama i ekonomskom moći Bosne i Hercegovine, čiji će konkretan doprinos afirmaciji Bosne i Hercegovine biti prepoznatljiv svim građanima Bosne i Hercegovine.
9. U obavljanju dodijeljenih poslova i zadataka, svi pripadnici Ministarstva odbrane i Oružanih snaga Bosne i Hercegovine dužni su postupati u skladu sa ovim Smjernicama.

III DALJE MJERE

10. Zajednički štab Oružanih snaga Bosne i Hercegovine će u saradnji sa Ministarstvom odbrane Bosne i Hercegovine izraditi prijedlog dokumenata kojim će, uključujući elemente iz ovih Smjernica, propisati obaveze, prava i dužnosti pripadnika Oružanih snaga Bosne i Hercegovine u vršenju službe.
11. Za praćenje i poduzimanje mjera na realizaciji ovih Smjernica odgovorni su rukovodioci organizacijskih jedinica Ministarstva odbrane Bosne i Hercegovine i načelnik Zajedničkog štaba Oružanih snaga Bosne i Hercegovine.
12. Ove Smjernice stupaju na snagu danom donošenja.

Broj: 06-03-8-1727/09
Sarajevo, 08.04.2009.godine

Dostavljeno:

- organizacijskim jedinicama MO BiH
- Zajedničkom štabu OS BiH
- a/a

